

1 TIMOTEO

Ɔko Ðeakatõ Gɔ I Paulo Ɔtsere Ɔtã Timoteo

¹ Mme Paulo gɔ nde Yesu Kristo Katõmesedze iki i bo Ðidze Ƴaa gu Kristo Yesu gɔ iba boto bonyɔ ɔri lotsere ɔko gɔgbe.

² Nto losu lotã-ɔ Timoteo. Aye sɔ ɔbi aɔe me i kafɔkaɔe ame. Lokare bo Ɔse Ƴaa gu Bosate Yesu sɔ matã-ɔ abualera, fɔ ara si aɔo ma kayiri si matã-ɔ isobue ana.

Paulo Ɔka Timoteo I Mila Maratedze Iso.

³ Kinio ne, lobie sɔ aakpese awe i Efeso le kumegɔ loɣere-ɔ ku ɔwi gɔ loto lokede Makedonia. Aye sɔ mawẽ pia i mmɔ gɔ mato mate ara wa loakpɔkpɔɔra bo ara ite i Kristo kafɔkaɔe iso. Lobie sɔ sã tã ma sɔ manyua ara wamɔ ite.

⁴ Ƴere ma sɔ manyua akuerera wa nna karõ gu siyekpare ifafare. Ara wagbe igbã se abɔ kakpadzẽ i maturi ndẽ. Iide Ƴaa adzuni iso mato mate ara. Adzuni wa nde kafɔkaɔe are lokote sɔ boatsue.

⁵ Nne ɔso fie loto losu karabara gagbe lopia i fɔ nrõ ame nde sɔ, boaregẽra kudɔe gɔ lobɔre i kaɣere sekelea gu kayiribielea ame. Bo Kristo kafɔkaɔe ana aade kagbaãre.

⁶ Maturi mawẽ ɔɔfiniki mabɔre i ara wagbe iso, ne ɔso maɔyu ɔri see, masu so mapia i kakpadzẽ ga nna karõ ame.

⁷ Mabie sɔ maakpese Mose mmara matedze ɣɛɛ ne, ma mɔmɔ iino ara wamɔ karɔ̃. Mase maɖe ika teteree i ara wa mainɔ karɔ̃ iso.

⁸ Bo ɔɖuɖu ɣe sɔ Mose mmara le, si boabara i me iso iyi pɔpɔpɔ.

⁹ Ikote sɔ boatsue ana sɔ iide maturi sɛɛ ɔso matã mmara, ɣɛɛ matsuelese ma losẽ ʒaa mmara gu ara lalaa mabaradze ma ngbã loyi ku ara nyanyarĩa ibara. Maɖe maturi ma loisiai kafɔkaɖe kukawẽ fie maɖe ma maɣese gu maturi mama maɖese ana.

¹⁰ Maturi ma nde manɔlese gu marerẽ ma nse maregu ma marerẽ laa. Maturi ma nse mayu maturi marɔdẽ gu maladze gu mma nse makã ndamu siefe. Mma ɔɖuɖu loise masiai ara ite sɛɛ ne, ma ɔso matã mmara ne.

¹¹ Itõme Bielea sekelea ne iɣe i ʒaa gɔ maale ɔsu ɔpia me i nroɔ ame i ara ite negbe ɔbɔɛ.

Paulo Ɔpe ʒaa Siba

¹² Lope Bosate Yesu Kristo siba i ɔle gɔ ɔtã me sɔ loabara ñ karabara ɔso. Nto lope wũ siba sɔ ɔnya me ɔturi gɔ lokote fie ɔkpere me sɔ lobara kasumu karabara gagbe.

¹³ Atoa sɔ lokpẽgu wũ, lotia wũ, fie loɣe anyakpi i ñ iso ku ɔwi gɔ lofe fie loaba loafiniki ne, ʒaa ɔnyɔ me nnya alaso ɔwi gɔmɔ ame ne, loifo wũ loɖe fie loiɣe nne loto lobara.

¹⁴ ʒɛɛ Bosate ɔfedza abualera gbodzoo ɔfere me iso fie ɔtã me kafɔkaɖe gu kudɔɛ, ara wa nde bo are si bobara mawẽ ku Yesu Kristo.

¹⁵ Itõme ne nto loɣe ngbe ne, gbaã idɛ fie ikote sɔ ɔturi biara aafɔ ne ɔɖe sɔ Yesu Kristo

ndɛ ʎaa ɔbi ɔɔ loba kayi gagbe ame sɔ si ɔba ɔɔadi maturi ɔbɔɛgu i ma akpi wa mato mabara ame. Makpibaradze magbe ame ne, mme ndɛ ɔɔɛakatɔ.

¹⁶ ʎɛɛ ʎaa ɔnyɔ me nnya sɔ iaki i mme ɔɔ mme lonyanyarĩ loɔɔ ma ɔɔɔɔɔ iso ne, Kristo Yesu aadi ɔ ɔɔɔɔ ɔte maturi manya kumɛɔɔ ɔsu kuɔɔɔ ɔtã makpibaradze ma lofo wũ maɔɔ sɔ ɔtã ma ngbã mɛ loise miro.

¹⁷ Ne ɔso ne, mitã sɔ boasu ile botã bo Igara ɔɔ i kato, ngɔ boito bonya ku bo anɔ fie ɔ ɔɔɔwɛ ndɛ ʎaa. Boala boɔkɔle ɔ ɔɔ loibakpi ɔnya iyere kato ɔaa. Si iba ngbɔ.

¹⁸ Wũ ɔbi Timoteo, karabara ga lotã-ɔ ngbe ne, ise i ara wa i kanyamaɔɔɔɔɔɔ ɔɔɔ masegu i fo iso ɔso. Mɔɛ atɔme wagbe la si aade iso i Bosate kakpã gagbe ame.

¹⁹ Mɔɛ fo kafɔkaɔɔ gu fo kayere la kukaako alaso mawɛ ma loikã ma situ atsue ne, mayu ngbã ɔri.

²⁰ Ma ndɛ mawɛ ndɛ Himeneo gu Aleksandro ne. Losu ma lotã Tsirise sɔ ɔkpadzɛ ma kutsue si maasuã sɔ maibala maɔɔɔ atsue pɛ i ʎaa iso.

2

La ɔɔkparama Kayi ɔwi Biara.

¹ Ira ɔɔɔɔɔɔ ne lobie sɔ aabara ndɛ sɔ, la ɔɔtã ʎaa iti si ala ɔɔkparama kayi i maturi ɔɔɔɔɔ iti. La ɔɔsu mi gu ma ɔɔɔɔɔ ara nyaa ɔɔɔ ʎaa katɔ.

² La ɔɔkparama kayi ɔɔtã magara gu mma ɔɔɔɔɔ nto maɔɔ maturi iso sɔ boawe i isobue gu

isoḡo ame ōwi biara so boasumu Ḳaa i kuware ame i ori biara iso.

³ Kayi ikparama negbe igbã nse ibo bo Ðidze Ḳaa ano ne.

⁴ Alaso oto obie so ðafɔ obiara obo ngbã fie maatsue nne nde onukuare.

⁵ Gbaã ne, Ḳaa ōwẽ ōde mpia. Kpuradze ōwẽ saã ana mpia go ð nde orerẽ go maro Kristo Yesu. O nse oledza bo gu Ḳaa inyo ndẽ ne.

⁶ O ōde losu so otã i kayiiso maturi odudu iti ne. Yesu obara nnegbe si ote so ōwi go i Ḳaa ōge ose so ðadi kayiiso maturi odudu oḡo.

⁷ Nnegbe oso i Ḳaa obara me ratedze gu katõmesedze ne. Gbaã ide, fie iide sila so ōdi me so loade Katõmesedze gu ratedze go loadi kafokade ara karõ ote mma loide ma Yudase.

⁸ I mafoddedze kasarekõ biara ne, lobie so marerẽ si makparama kayi ku situ sekelea so si Ḳaa onya ma nroõ sekelea ne, ðatsue so maodi so maboregu i ara lalaa ame fie sikipã gu kakpadzẽ na i ma ndẽ.

⁹ Lobie ana so marõgo aanyo ma arapia iso so aibatsue ano, nnegbe loate so mabo so karõ ne. Iile so maanyi akpofa siare, makere so gu sikaretea ara agbaagbã wa lofo kuḡa go loate kato ikoleso.

¹⁰ Ḳee ne, ma sibara see si siqi site so made marõgo ma nsiai Bosate.

¹¹ Orõgo biara si obo so karõ si osuã ara i karõ iboso odudu ame.

¹² Loitã ma ori so mate marerẽ ara, gee made marerẽ iso. Ḳee mama kanya si mase.

¹³ Alaso Adam i Yaa oḍe katõ obara fie obara Eva.

¹⁴ Fie iide Adam i Tsirise ososola, xee orõgo ososola fie otã so obara ikpi.

¹⁵ Yee si orõgo oya teteree i õ kafokaḍe ame ku kuḍe fie obara so sekelee obõ so karõ ne, õaki i õ kuye ame pokõso.

3

Mma Igbã Lokote Mafõḍedze Matõḍedze.

¹ Gbaã ide so si oturi to obie so õakpese mafõḍedze tõḍedze ne, oto obie karabara see.

² Mafõḍedze tõḍedze ne, ikote so õaḍe oturi go atsue na iso, fie oḍe orõgo owẽ yiridze, õ ano okpa, ose oḍe so iso, fie maturi se maware wũ. Jaḍe ngo nse ofo mafõ fie oḍe ratedze see.

³ Oibaḍe ngo nse one ndã orẽ, õibaḍe kulu baradze. Yee ikote so õaḍe oturi xõa, ngo loise oḍe atõme ikpadzẽ fie ona sikã kanõbebe.

⁴ Ikote so õaḍe ngo nto onyo õ iyo iso kukaako fie õ mabi se makã itõme atsue i ori biara iso.

⁵ Si oturi go loibawo õ mõmõ iyo maturi iso onyo ne, nda õabara fie õawo Yaa mafõḍedze okõko?

⁶ Ikote so õaḍe fõḍedze xete so õaba õakõle so kato fie iaki i ne iso so õaba õakpase le kumego i Tsirise okpase awe.

⁷ Ikote so õaḍe oturi go mba iyere see i mma loide mafõḍedze ana katõ so maibaḅe ara nyanyarã i õ iso fie õabo i Tsirise iyebi ame.

⁸ Mafõḍedze kasarekõ mabuaidze ne, ma wũ ikote so maḍe maturi ma mba ngbã see fie maibaḍe sinyagemi inyo maturi, maḍe mma

loise mane ndã marẽ fie ma anɔ iise abe i sikã iso.

⁹ Ikote sɔ maamɔẽ kafɔkaɖe Itõme Bielea ne mafɔ ngbe teteree ku situ dze loibatã ma ipɔ.

¹⁰ Ipia sɔ aala ma ngbã anyɔ fie si ainya iɣere kuiwẽ i ma iso fie aatã sɔ maakpese mafɔɖedze mabuaidze.

¹¹ Ma mare ana ne, ikote sɔ maade marõgo ma nsi ngbã sɛɛ fie maise maye maturi iso ara. Maade marõgo ma loise marẽ ndã fie mase mabara ira biara kukaako.

¹² Nyɔ sɔ mabuaidze magbe obiara yiri ɔrõgo ɔwẽ, ɔto ɔnyɔ ð mabi gu ð iyo maturi ɔɖuɖu iso kukaako.

¹³ Mabuaidze ma lomɔẽ ma karabara kukaako ne, ma mɔmɔ ba kayakpa fie mase mawo kafɔkaɖe gu Yesu Kristo iso itõme ɔɣe ku ɔle.

¹⁴ Atoa sɔ nto lotsere ɔko gɔgbe lotã-ɔ ne, nto lonyɔ ɔri sɔ loaba fɔ kɔre i ɔwi kurukutu ame.

¹⁵ ɸɛɛ nto lotsere sɔ si logbikama ne, aatsue kumego ikote sɔ ɔturi aase ngbã i ɸaa iyo ne nde ɸaa gɔ mba ngbã mafɔɖedze ndẽ. Mafɔɖedze magbe nyɛ i ɔnukuare kama ne.

¹⁶ ɸaa itõme wɛɛa ne maɖi mate ne, iba kuxa gbaã fie ɔturi kuwẽ iibawo ne ɔẽ. Ne nde sɔ,

“Bosate ɔba le ɔturi Awune ɔbi.

ɸaa Siwarã ɔkɔle wũ le ɔturi bɔlɔlɔa.

ɸaa makpabo ɔnya wũ.

Maturi ɔɣe ð iso itõme i abuiti ɔɖuɖu ame.

Maturi gbodzoo ɔfɔ wũ maɖe i kayiiso.

Fie ɸaa ɔsu wũ ɔkelegu kato i ikpawai ame.”

4

Maturi To Maasiai Mila Maratedze.

¹ Ƴaa Siwarã ɔɔɔ siɣere bo sekelee sɔ i ayi tsɔra ame ne, maturi mawẽ to maabɔre i kafɔkaɔe itõme mɔmɔ ame masiai kasola siwarã gu mma loasu so matã Ɔbosam ara ite.

² Maturi magbe sɛ mate mila, alaso ma kayere ɔɔkpi le ibɔra mapia i ɔto masu mamatãra kã iso.

³ Mase mate sɔ iikote sɔ maturi ayiri marõgo. Mase masẽ aɔera agbã awẽ ana. Ƴɛɛ Ƴaa loɔi araɔea ɔɔɔɔɔ sɔ mma lofo wũ maɔe gbaã fie masiai õ itõme si maɔe ku siba ipɛ.

⁴ Ira biara ne i Ƴaa ɔɔɔ ne, ile. Ne ɔso iikote sɔ maturi aasẽ aɔera kuawẽ. Ƴɛɛ maafɔ ira biara ku siba.

⁵ Alaso Ƴaa itõme gu bo siba ipɛ ɔsekelera iradɛa biara.

Ngɔ Nɔe Kristo Yesu Ɔɔɔabo Sɛɛ.

⁶ Si ate mafɔɔɔɔɔ ara wagbe ne, ato aɔe Yesu Kristo rabaradze sɛɛ go nto ɔkararã so i kafɔkaɔe gu ɔnukuare itõme ne kama asiai ame.

⁷ Ne ɔso rera so kama i mawa anatika wa loikote sɔ maɔe kɔre si akpadzẽ so atã ngbã sekelea isɛ.

⁸ Sosina ame ɔle le kakaaka Ƴɛɛ ne, Ƴaa itõme ifafare sɔ aabara i ne iso ba kusia i ɔri biara iso. Alaso ito iatã-ɔ kusia i ngbã mɛgbe gu mme nto miba ame.

⁹ Nnɛgbe nɔe itõme gbaã ne lokote sɔ ɔturi biara aafɔ ɔɔe ne.

¹⁰ Nnɛgbe ɔso fie boto bokpẽ, boɣɛ i karabara iso teteree ne. Alaso bo ɔriinyɔ ɔɔɔɔɔ sia i Ƴaa

gɔ mba ngbã fiε ɔɔɔe maturi ɔɔɔɔɔu Ðidze iso titirio mma lofo wũ maɔe.

¹¹ Karã ara wagbe irɔĩ tã ma si ate wã.

¹² Daatã kuwẽ si ɔnyɔ-ɔ itititẽ alaso abara ɔbiεε ɔso. Υεε ne, ɔe ikparĩ tã mafɔɔɔɔɔɔɔe ɔɔɔɔɔu i fo ikade gu nsegbai gu fo maturi kuɔɔε gu kafɔkaɔe ame gu fo ngbã sekelea ise ame.

¹³ Ya teteree si ala ɔɔka Υaa itɔme ɔgere mafɔɔɔɔɔɔɔe ɔɔɔɔɔu. La ɔɔɔɔɔɔi wã karɔ ɔɔte ma gbɔgbɔɔgbɔ ɔwi gɔ ame loaba.

¹⁴ Υaa siawarã ame karatã ga i Υaa ɔsu ɔpia i fo ame iki ɔ kanya maɔidze nne maγe gu mafɔɔɔɔɔɔɔe makpakpa ma losia-ɔ nrɔɔ iso ne, daanyua kã karabara.

¹⁵ Bara ara wagbe si asu so atã wã pelepele ɔ maturi ɔɔɔɔɔu aanya fo ngbã katɔ ise.

¹⁶ Mɔɔ so la kukaako gu fo ara wa ato ate si aya i karabara iso teteree. Alaso si abara ngbɔ ne, ato aadɔ so gu mma ɔɔɔɔɔu nse makã fo itɔme atsue abɔreɔu i kutsue ikpadzẽ ame.

5

Nyɔ Makuɔɔɔe Gu Matɔɔɔɔɔe Gu Marabaradze Iso Kukaako.

¹ Daafafã ɔreɔrẽ gɔ nde-ɔ ɔkpakpa. Υεε ne, ɔi ara karɔ te wũ ku ɔtu γɔa le fo ɔse awe. La maporoporoi le fo manyiibi awe.

² La marɔgo ma nde-ɔ sikpakpa le fo ɔnyi merẽ awe si ala mabite ana le fo manyiiko i isekele ɔɔɔɔɔu ame.

³ Makuɔɔɔe ma nna buaidze ne, la ma kukaako ku kuware.

⁴ Үе si kuedze ɔrere ba mabi җee mawa ne, mabi mamɔ si masuã kumegɔ maanyɔ ma ayo maturi iso fie maala ma mayese le mafɔdedze karabara awe. Maɟi ma mayese kule ala nnegbe nse ibo Үaa anɔ ne.

⁵ Kuedze gɔ nna buaidze ne, ɔsu ɔ ɔriinyɔ ɔɟuɟu ɔsia i Үaa iso fie ɔse ɔkperere wũ kasẽ i kakɔme sɔ ɔbuai wũ.

⁶ Үе kuedze gɔ nsi sɔ ɔto ɔɟe ngbã ne, ɔna ngbã i Үaa anɔmi ame atoa sɔ ɔsi ngbã.

⁷ Karã ara wagbe irɔi tã ma sɔ maase ngbã me i maturi iibadi ma iyere.

⁸ Si mi ndẽ ɔrere ɔsẽ sɔ ɔito ɔnyɔ ɔ iyo maturi iso kukaako ne, mitsue sɔ ɔisiai kafɔkaɟe fie ɔnyanyarĩ kɔra ɔɟo ngo loifiniki.

⁹ Daasu kuedze gɔ loifo ako sikuɔ iyere abua i mafɔdedze makuedze ikuri ame. Kuedze gɔ loabo ikuri nemɔ ame ne, ikote sɔ ɔaɟe ɔrɔgo gɔ loyiri kurã kuwẽ pe.

¹⁰ Ikote sɔ maturi aaro wũ iyere see ala ɔ kurabarara ɔso. Үaɟe ɔrɔgo gɔ lokpadzẽ ɔ mabi kukaako fie ɔse ɔfo mafɔ, ngo nse ɔnyɔ mafɔdedze anyaa iso kukaako. Үaɟe ngo nse ɔnyɔ maturi ma mpia i inyewe ame nnya fie ɔsi ɔ ngbã ɔɟuɟu ɔtã ara see ibara.

¹¹ Makuedze biɟe ne, daasu ma ayere abua i makuedze ikuri iso. Alaso si kurã iyo ise ɔmerẽ ɔtse ma ɔkã ikpẽ ne, mato maakpese i Kristo kama sɔ maayiri arã.

¹² Nnegbe to iatã maɟe ipo ala matu ndamu me makã matã Үaa.

¹³ Ne kama ne, mase manina ɔwi mawe maki i maturi ayo maye kutsue kpɔlɔkɔi. Nne lonyan-

yarĩ idɔ ɔduɔdu ndɛ sɔ ne, mase maɣe maturi iso ara, mma nse mapia kulu i maturi ndě, maɛe aka wa loikote.

¹⁴ Ne ɔso loabie sɔ makuɛdze biɛɛ si mayiri arã, maɣe mabi si manyɔ ma ayo iso bowũ. Nnegbe aatã sɔ maibabara ara wa loikote sɔ bo matsirise iibana ɔri masopara bo.

¹⁵ Nto loɣe ngbo alasɔ makuɛdze mawě ɔɔfiniki masiai Ɔbosam kama koko.

¹⁶ Si fɔɔɛdze rɔgo ɔrere ba makuɛdze iyo ne, ɔnyɔ ma iso sɔ makuɛdze mamɔ ato iibasiasia i Ƴaa mafɔɔɛdze iso. Ɖtã sɔ mafɔɔɛdze tsɔra si manyɔ makuɛdze ma nna buaidze iso.

¹⁷ Mafɔɔɛdze matɔɔɛdze ma nse makɔkɔ maturi kukaakɔ ne, ikote sɔ maafɔ kuware gu kuso go lokɔle kato. Titiriu mma nto mate ara fiɛ mato maɣe Itɔme Bielea ana.

¹⁸ Alasɔ maɣe i Ɖko Sekelea ame sɔ, “Daanyi boi go nto ɔbuai-ɔ i fɔ ɔkpě ame kanya.” Ana ne, “Ikote sɔ rabaradze biara aafɔ ɔ kuso.”

¹⁹ Si ɔrere ɔba ɔaɣe ira i tɔɔɛdze iso ne, daafɔ aɛe si iide maturi inyo ɣee ite loba.

²⁰ Mma nto mabara ara lalaa ne, ɔji te ma i mafɔɔɛdze ɔduɔdu katɔ iyo matsɔra ka mato maanigã.

²¹ Nto loɣere-ɔ i Ƴaa gu Kristo Yesu gu Ƴaa makpabo sekelea katɔ sɔ bara ara wagbe iso kukaakɔ sɔ aibanyɔ kuwě i katɔ akarã mawě ana anɔmi.

²² Daatata so i nrɔɔ isia maturi iso itã Ƴaa karabara. Daapia korɔ i maturi mama ara lalaa ibara ame bowũ ne, la so sekelee.

²³ Fɔ kayiri ɔnye ɔso ne, daala ɔɔne ndu kunu. Le so aala ɔɔne ndã kekeĩ le kua awe.

²⁴ Maturi mawẽ akpi wa mase mabara iise awere fie ise ite so maakpadzẽ ma kutsue. Yee mawẽ ana ne, kama kama fie ma akpi aabore i ɔgbami.

²⁵ Ngbo ame i ara see wa i maturi se mabara ana iise awere ne. Si aibore i ɔgbami kinio maturi ɔnya ne, ɔwi i katõ ame ne, ato aate manya.

6

¹ Yere mafɔdedze ma nde masande ɔduɔdu so mabo so karõ matã ma makose i karabara biara ame so maturi iibaɔe ika nyanyarĩa i Yaa gu bo kafɔkaɔe ara ite iso.

² Mafɔdedze ma nde masande fie ma makose ana de mafɔdedze ne, madaasu ma sinyii ibara mata maya ma makose iso. Yee ikote so maabo so karõ matã ma mabuai ma mabua. Alaso mma mato mabuai ne, ma wũ mafɔdedze maɔe. Fie ma gu ma ɔduɔdu nde Yaa sigarakadekõ maturi ma ɔse ɔɔe gbaã. Te ara wagbe si apia ma ɔto so mabara wã.

Anɔ Si Arɛte-ɔ I Yaa Isiai Ame.

³ Ɔturi biara go nse ɔte ara wa loikotegu Bosate Yesu Kristo atõme yee kafɔkaɔe are ne,

⁴ kato kere ɔto ɔkole so. Jiye kaira fie kakpadzẽ siefe ɔokpese wũ ɔnye. Ɔba sirere ikpẽ, kalɔ, maturi sitia gu adzuni nyanyarĩa ibu i maturi iso.

⁵ Mase makpadzẽ atõme ɔwi biara. Maturi magbe kayere okpi fie ɔnukuare ɔoyu ma iso.

Mabu sɔ masiai kafɔkaɖe ɔri iso si maana karana.

⁶ Gbaã idɛ sɔ kusia gbodzoo pia i ʏaa kasumu ame itã bo si ara wa boba sɛ abo bo anɔ.

⁷ Alasɔ gɔ mayɛ bo ne, boito kuira bobɔ kayiiso. Fie ikpa sekelee ana sɔ si boarui ne, boibasuu kuira bokɛlegu.

⁸ Ne ɔso mitã bo arapia gu aɖera wa boba si abo bo anɔ.

⁹ ʏɛɛ mma anɔ nse arete i karana iso ne, mase makpase mabo i ʔbosam ayebi ame. Mase mabo i adzimira ibara ame. Ara lalaa sɛ abɔre ma iso fie ase anina ma ngbã makpi mawɔ pelepele.

¹⁰ Alasɔ sikã kuɖɔɛ ame i ara lalaa agbãagbã sɛ abɔre. Sikã kuɖɔɛ gɔgbe ɔso i maturi mawẽ ɔɔyu ma kafɔkaɖe ɔri sɛɛ fie ma ngbã ɔɖuɖu ɔbo i inyewe ame ne.

ʏa I Kafɔkaɖe Karabara Iso Teteree.

¹¹ Gɔ aɖe ʏaa ɔturi ɔso ne, ɖi so bɔregu i ara wagbe ɔɖuɖu ame si asiai isekele, ʏaa kunigã gu kafɔkaɖe kama. Siai Bosate i kafɔkaɖe gu kuɖɔɛ ame. Na ɔtu si ala maturi ɔɖuɖu kukaako.

¹² Kpẽ kafɔkaɖe kakpã teteree si ana ngbã me loise miro. Ngbã megbe ɔso fie ʏaa ɔkpere-ɔ ku ɔwi gɔ abusi fɔ kafɔkaɖe ame i mafɔɖedze mama katõ ne.

¹³ I ʏaa Kato gu karõ Baradze gu Yesu Kristo katõ, ngɔ lobusi õ kafɔkaɖe ɔte i Pontio Pilato katõ nto lotã-ɔ mmara megbe.

¹⁴ Loɣere-ɔ sɔ mɔẽ mmara megbe la kukaako sɔ kuwẽ iibawo-ɔ iɣere ɔɖi gbɔgbɔɔgbɔ ɔwi gɔ i Bosate Yesu Kristo aaledza iba.

¹⁵ Ƴaa gɔ lokote sɔ maale fie ɔto ɔɔɔ ira biara iso, ɔ̃ nde magara ɔɔɔɔ igara gu makɔse ɔɔɔɔ ɔkɔse to ɔ̃atã Yesu ɔledza iba i ɔwi gɔ lokate wũ iso.

¹⁶ Ƴ ɔnɔwẽ nde ngɔ nsi ngbã ɔ̃ise ɔkpi ɔnya. Ƴto ɔfie sɔ kuwẽ iibawo wũ ɔnyɔ ku anɔ. Kuwẽ kuwẽ iinya wũ ɔnya fie kuwẽ ana iibawo wũ ɔnyɔ. Ile gu ɔle ɔɔɔɔ ne, ɔ̃ ɔre ɔɔɔ ɔwi biara. Si iba ngbɔ.

¹⁷ Ƴere mma mba kayiiso karana sɔ madaakɔle sɔ kato masu ma ɔriinyɔ masia i ara wa loibawo ma ɔɔi iso. Ƴɛɛ masu ma ɔriinyɔ masia i Ƴaa iso. Ƴse ɔtã bo ira biara ku kayiribielea sɔ boana isoɔɔ.

¹⁸ Ƴere ma sɔ mala maɔbara isɛɛ sɔ maakpese maranase i ara sɛɛ ibara ame. Mala maɔtã mawereba ara ku ma situ faa.

¹⁹ Si mabara ngbɔ ne, mato maana karana ga loise kanina fie kase katã ma ɔwi biara, ana ne, mato maana ngbã sɛɛ memɔ.

²⁰ Timoteo, nyɔ sɔ aadzuẽ ara wa i Ƴaa ɔsu ɔtã-ɔ kukaakɔ. Sẽ akaɔɔ wa nna karɔ̃ fie aite Ƴaa kunigã si arera sɔ kama i kakpadzẽ ga nna karɔ̃ ga i mawẽ ɔsu masɔsɔla maturi le inɔgba atɔ̃me ide.

²¹ Ƴɛɛ gɔ mawẽ ɔbu sɔ maɔe ara wagbe ɔso ne, maɔyu kafɔkaɔɔ ɔri.

Lokare sɔ Ƴaa abualera si awegu mi.

Siwu

Siwu: Ndamu Yεε Siwu New Testament

copyright © 2008 Wycliffe Bible Translators, Inc.

Language: Siwu

Contributor: Wycliffe Bible Translators, Inc.

All rights reserved.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

b5020a1a-c7b9-512a-9b46-1e462be571d4